

1 TESALONICENSES

Pablowã queétdih ã túyat tútat

¹ Weém Pablo, yeéb Tesalónica tútchidih moón jwĩ íp Dioíhwã, jwĩ Maáh Jesucristoíhwãbut ñi jumuchah, nin núodih biíhdih daacát túttnit, yeebdíh wã wahna caá. Weém, Silvano, Timoteojĩh, jwiit biíc peihcannit yeebdíh búdí jwĩ túyat túttna caá. Jwĩ íp Dios yeebdíh oinit, ã teo wáaca naáh, ñi túi jumát pínah niijná.*

Tesalónicadih moón ã tútat nuumát

² Diosdih uúbhna, “Míih Tesalónicadih moón ã tútat nuumátji ã túina caá, Paá”, jwĩpĩ niijná caá. ³ Yeebdíh náhninit, Diosdih nin pah jwĩ niij uúbhna caá: “Paá, míih Tesalónicadih moón meemdíh túi jenah joinít, ma weñat pínahdih ípĩ chãjna caá. Meemdíh oinit, bitadihbut oina, queétdih ípĩ túi teo wáacna caá. Jesucristo ã jwúub dei júúwát pínahdih túi wēi pãinit, meemdíh ã cádahcan caá”, jwĩ niijná caá. Páant ñi jumátndih búdí wēinit, Diosdih “Túina caá, Paá”, jwĩpĩ niijná caá. ⁴⁻⁵ Jwĩ déewã panihnitá, Jesucristoíh túini doonádh yeebdíh naóhna, oboh jumni naáwát nihcan jĩ. Obohjeéhtih, Túini Espíritu ã wēpatjĩh yeebdíh jwĩ naáwáp jĩ. Páant jwĩ naáwáchah, Túini Espíritu yeebdíh ã teo wáacap jĩ, jwĩ naáwátndih joinít, ñi jepahat pínah niijná. Páant ñi jepahachah, Dios yeebdíh oinit, áihwã pínah ã ñíwatndih jwĩ jéihna caá. Ñijeéh jumnit, yeebdíh jwĩ túi teo wáacatndih yeebbút ñi jéihna caá.

* **1:1** Hch 17.1

⁶ Ñijeéh jumna, ded pah jwĩ chãjatjidih ennit, jwĩ Maáh Jesucristo ded pah ã jumatji doonádihbut jéihnit, yeebbát biíc yoobó ñi chãjna caá. Jesúih túini doonádih joíhcan íjna, bita yeebdíh yeejép ã chãjachah yuhna, Túini Espíritu yeebdíh ã teo wáacachah, yeéboó wěinit, Diosdih ñi túi joyóp jĩ.* ⁷ Páant ñi jummat doonádih joinít, nihat ñíih baác Macedonia baác dih moón, nin baác Acaya baác dih moón Jesúihwã ñi jummat pah muntih túut nuumná caá ã chãjap. ⁸ Pánihna, jwĩ Maáh Jesúih doonádih jepahnit, ñi túi túut nuumátji doonádih joinít, bitabut jwĩ Maáhdih ãt jepahap wut jĩ. Ñíih baác dih moón, Acaya baác dih moonjéhbüt nihcan, nihat baác dih moón Diosdih ñi túi jepahat doonádih ãt joyóp wut jĩ. Ñi wüt yána caá. Jwiítboó ñíih doonádih queéd dih jwĩ naóh jwuhcah, queét jãtíh ãtát joyóp tabe. ⁹ Pánihna, ñi túut nuumát doonádih jwĩ naáwát déedih, yeéb jwiít dih wěi jwãáhnit, ñi túi joyátjidih ãpĩ jwãáh naáwáp jĩ. Ñi pãpninadih wúbh cádahnit, Dios yoobát dihjeh wěi wúbhnit, ã wutat dih ñi túi jepahatjidihbut ãpĩ naáwáp jĩ. ¹⁰ Dios wãúh jeámant ã jwúub dei jãúwát pínahdih ñi túi páñatdihbut ãpĩ naáwáp jĩ. Caán Jesús wãnnijidih yuhna, Dios ãt boonanap tajĩ. Caan tígaá Dios yeejép yoobát ã peéh chãjat déedih jwiít dih ã túi ubna caá.

2

Tesalónicadih jumna, ded pah Pablo ã jumatji

¹ Ñijeéh jumna, yeebdíh jwĩ bohénachah, túi wěi joinít, ñi jepahap jĩ. Páant ñi jepahachah,

* **1:6** Hch 17.5-9

jwĩ tawat oboh jamni nihcatdih ñi jéihna caá.
² “Pablowã jwiít dih enedih ã jũúwát pínah jãtih, Filipos tátchiboó ã bohénachah, íjnit, caán tátchidih moón queétdih yeejép ã chãjap jĩ”, yeebboó ñi niúj náhnina nacaá. Obohjeéhtih, Filiposdih moón jwiít dih yeejép ã chãjachah yahna, úumcanjeh, Jesúih doonádih yeebdíhbut naáwádih jwĩ jwibínap jĩ. Biquína ñih tátchidih moón maáta jwiít dih ã naóh cádahat túutuchah yahna, Dios ã teo wáacatjĩh Jesúih doonádih yeebdíh jwĩ túi naáwáp jĩ.*
³ “Pablowã yoobóp dih ã naóhcan caá. Yeebdíh pánih bohéna, queétdih ñi weñat pínahdihjeh ã bidna caá”, biquína ã niúj yeena caá. ⁴ Obohjeéhtih, Dios jwĩ jenah joyát dih jéihni nin pah ã niúj naáwáp jĩ: “Jesúih túini doonádih ã naáwát pínah niijná, Pablowádih wã wahbipna caá”, ã niijíp jĩ. Pánihna, caandíh naóhna, “Pablowã túi chãjnit caá”, bita ã niúj jenah joyát pínahdih jwĩ bidcan caá. Diosboó “Í túi chãjna caá”, ã niiját pínahdihjeh bidnit, Jesúih doonádih jwĩ naáwáp jĩ.* ⁵ Pánihna, yeebdíh naóhna, túini niiját pah niijcán, ñih bíí déedih náahcan, ded pah jwĩ bohéátjidih ñi jéihna caá. Diosbut páant jwĩ chãjatjidih ã jéihna caá. ⁶ “Pablowã chah jéihnit caá”, yeeb, bitabut ñi niúj jenah joicát pínah niijná, yeebdíh jwĩ bohénap jĩ. ⁷ Jesucristoíh túini doonádih yeebdíh naáwát túutna, Dios ã wahnit jamna, yeebdíh búdí jwĩta jéih wat tagaá. Obohjeéhtih, pánih watcan, búdí oinit, chaíhjah bohéna, yeebdíh jwĩ yójahcap jĩ. Nomanih mi wũúhdih túinijeh mi en dawát pah yeebdíh jwĩ bohénap jĩ. ⁸ Yeebdíh búdí oinit,

* **2:2** Hch 16.19-24; 17.1-9 * **2:4** Gá 1.10

wěina, nihat yeó jáap jummat pah túini doonádih jwĩ naáwáp jĩ. Bitá jwiít dih ĩ mao yohíhat dih jéihna yuhna, yeebdíh jwĩ teo wáac cádahcap jĩ. ⁹ “Jwĩjeéh ĩ jum láa, ĩh bácah ã chũnáchah yuhna, búdí ĩ tewep jĩ”, ñi niúj náhnina nacaá. “Baáb jéenat pínah jãtih teo jwíhñit, púú nihat yeó jáap teo tãah bejnit, chei tac yoob póhba ĩpĩ teo cádahap jĩ. Pánihna, Dioíh túini doonádih naóhñit, jwiít dih tac buugáihcan, ĩ jeémát pínahdih jíib chãjat túut niijná, búdí ĩ tewep jĩ”, ñi niúj jéihna caá.*

¹⁰ “Jwĩjeéh jumna, Dios ã weñat pínahdihjeh chãjnit, ĩ túi jumap jĩ”, ñi niúj jéihna caá. Diosbut caandíh ã jéihna caá. Pánihna, bita “Pablowã yeejép ĩ jumap jĩ”, ĩ jéih niijcán caá. ¹¹⁻¹² “Jwiít nihatdih túinijeh ĩ bohénachah, jwĩ túi joyóp jĩ. Biqúinadihbut jwiít dih ĩ naáwáp jĩ. Ded ã wehdih ã túi bohéat pah jwiít dih ĩ túi naáwáp jĩ. Dios ã weñat pínahdih ded pah jwĩ chãjat pínah niijná, búdí ĩ bohénap jĩ”, ñi niúj jéihna caá. Dios yeebdíh ãt ñíwip wut jĩ, ãihwã jumñit, ãjeéh ã maáh jumapboó ñi jummat pínah niijná. Páant yeebdíh jwĩ bohéatjidihbut ñi quíib buudcán nacaá.

¹³ Pánihna, yeebdíh jwĩ naáwát dih ñi túi jepahachah náhninit, búdí wěinit, “Túina caá, Paá”, Diosdih jwĩpĩ niijná caá. ã naáwát dih yeebdíh jwĩ bohénachah, nin pah ñi niúj jenah joyóp jĩ: “ĩ jenah joyátjĩhjah naóhna ĩ chãjcan caá. Dios naáwát yoobát jwiít dih bohéna caá ĩ chãjap”, ñi niúj jenah joyóp jĩ. Pánih jenah joiná, caán naáwát dih joinít, Jesús dih jepahna, túiniboodíh túut nuumná caá ñi chãjap. ¹⁴ Judea baác dih moón Dioíhwã ĩ

* ^{2:9} Hch 18:3; 2Ts 3.8

jumat pah yeebbát biíc yoobó ñi jumna caá. Dios ã wahní Jesucristodih queét ĩ jepahat jíib, ĩih baácdih moón judíowã, queétdih yeejép ĩ chãjap jĩ. Pánihat pah muntih, yeebbát Jesúsdiĥ ñi jepahat jíib, ñíih baácdih moonjéh yeebdíh yeejép ĩt chãjap taga.* 15 Queét judíowã jon jãtíh Dios naáwátdih naóh yapanitjidiĥ yehna niijnít, ĩt mao yohop tajĩ. Túttimah, jwĩ Maáh Jesucristodihbút ĩt mao yohop tajĩ. Túttimah, Dios naáwátdih ñi joicát pínah ni-ijná, jwiítboodíh ñíih tútchimant ĩ bacanap jĩ. Pánih chãjna, Diosdiĥ búdí íjanit, niĥat cãacwãdihbút ĩ eníhcan caá.* 16 Judíowã niĥcannit iiguípna ĩ bejat déedih náahcan, Jesúsíh doonádiĥ naáwádiĥ jwĩ bejehchah, judíowã jwĩ naáwátdih ĩ jãhíhip yah jĩ. Pánihna, Diosdiĥ yehna ĩ niiját jíib, íjnit, Dios queétdih búdí ã peéh chãjbipna caá.

Pablo Tesalónicadiĥ moondíh ã jw^{uub} eníhat

17 Yeebdíh wã cádah jãúwúchah, wíih caolih ñijeéh ã páñap be. Maátcanjeh ñijeéh wiĥcan yahna, yeebdíh búdí jwĩ bidip be. 18 Pánihna, búdí oina, yeebdíh enedih jwĩ jw^{uub} bejíhip yah be. Weemjéh dawá láa yeebdíh búdí enedih wã bejíchichah yahna, Satanás jwĩ jib bejatdiĥ ã jãhap jĩ. 19 Yeebdíh Jesúsíh doonádiĥ jwĩ naáwáchah, ñi túi joyátjidiĥ náhninit, búdí jwĩ wěina caá. Jwĩ Maáh Jesús ã jw^{uub} dei jãúwúchah, ñi jepahatjidiĥ jenah joinít, búdí wěina, “Jwĩ naóhniji túini doonádiĥ ĩ túi jepahap jĩ”, Jesúsdiĥ jwĩ niíj naóhbipna caá. 20 Pánihna, yeebdíh jwĩ naáwáchah, ñi jepahatji jíib,

* 2:14 Hch 17.5 * 2:15 Hch 9.23,29; 13.45,50; 14.2,5,19; 17.5,13; 18.12

jwĩ Maáh jwiít dih ã wẽi naáwát dih jéihnit, jwiítbut búdí jwĩ wẽina caá.

3

Timoteodih ã wahat

¹⁻² Pánihna, yeebdíh búdí náhni dahwanit, yeebdíh ã enat pínah niijná, Timoteodih ñi pebhna jwĩ wah bojop be. Caán jwĩ úud panihni, weemdíh pej jumni, Cristoíh túini doonádih ãpĩ naáwáp jĩ. Diosjeh caandíh ã wahachah, weemdíh búdí ã teo wáacap jĩ. Pánihna, yeebdíh ã bohéat pínah niijná, ñi pebhna caandíh wahniji, Atenas tátchiboó biícjeh wã páñap jĩ.* ³ Jesúsdih ñi jepahatji jíib bita yeebdíh yeejép ĩ chãjachah yuhna, Diosdih ñi cádahcat pínah niijná, yeebdíh wã bohéat táutap jĩ. “Jesucristodih jwĩ jepahachah, jwĩ táut nuumátdih íjnit, áihwã nihcannitboó jwiít dih yeejép ĩ chãjbipna caá”, jwĩ niíj jéihna caá. ⁴ Ñijeéh jumna, páant jwĩ yapat pínahdih dawá láa yeebdíh jwĩ naáwáp jĩ. Bũũ jwĩ naáwátji pah ã yapatdih ñi jéihna caá. ⁵ Pánihna, ded pah ñi jumatdih búdí jéihíhna, Timoteodih wã wahap jĩ. “Nemépwã ĩ maáh queétdih ã yee naáwáchah, ¿queétboó caandíh yehna ĩ niijná níit? Yehna ĩ niijcáh, nihat conboó jwĩ bohéat búdí jwĩ tewatji bũudní ã jumbipna caá”, wã niíj jenah joyóp jĩ.

⁶ Bũũ Timoteo, ñi pebhboó juibíniji, ã jwáub juyáp jĩ. Jwáub juinít, “Nihat Tesalónica tátchidih moón meemdíh búdí ĩ túyat táutap be. Queét Dios naáwát dih tái joiná beé ĩ chãjap be. Túi joinít, Diosdih búdí oinit, ĩ míic tái oina beé. Yeebdíh náhninit,

* **3:1-2** Hch 17.15

búdí wēinit, yeebdíh ì bidna beé. Yeéb queédih bidnit, búdí enedih ñi bejíhat pah muntih, queébtut yeebdíh ì bidna caá”, weemdíh ã niíj naáwáp jĩ.*
 7 Páant ã niíj naáwáchah, yeebdíh jwĩ náhni dah-waat ã yayáh bejep jĩ. Yeéb Dios naáwát dih jepah-nit, ñi túi jumat doonádih joinít, bita jwiít dih yeejép ì chājachah yahna, búdí jwĩ wēina caá. 8 Yeéb jwĩ Maáh Jesúsdih ñi túi péenachah, jwĩh caolih búdí ã wēina caá. 9 Pánihna, “Paá, ma teo wáacatjĩh queét Jesúsdih ì túi péeatdih jéihna, búdí wã wēina caá. Páant weemdíh ma weñaat ã táina caá”, Diosdih wã niijná caá. 10 Pánih wēinit, yeó jáap, cheibut Diosdih búdí jwĩ úbhna caá, yeebdíh enat túutna, jwiít dih ã wahat pínah niijná. Yeéb Jesúhwã ded pah ñi túi chājat pínahdih beh joyát yeebdíh páantjeh ã jadhuchah, ñi pebhna jwúub bohénadih jwĩ bejíhna caá.

11 Yeebdíh jwúub enedih jwĩ bejat pínah niijná, Satanás ã jáhat panihatdih ì yohat pínahdih jwĩ íp Diosdih, jwĩ Maáh Jesucristodihbut búdí jwĩ úbhna caá. 12 Pánih úbhna, jwĩ Maáh yeebdíh ã teo wáacat pínahdih jwĩ úbhna caá, chah míic oinit, nihatdihbut ñi oyat pínah niijná. Pánihna, yeebdíh búdí jwĩ oyat pah muntih, yeebút biíc yoobó ñi oyat pínahdih wã náah yacna caá. 13 “Paá, queédih ma túi teo wáacá, ma weñat pínahdihjeh ì chājat pínah niijná”, jwĩ niíj úbhna caá. Páant ã teo wáacachah, jwĩ Maáh Jesucristo nihat áihwãjeéh jwúub dei jǎóhnit, Jesús jwĩ íp Diosdih nin pah ã niíj naóhbična caá: “Queét túinit ì jumuchah, queédih dedé peéh chājat pínah ã wihcan caá”, ã

* 3:6 Hch 18.5

nijbipna caá.

4

Dios ã weñat pínahdih ded pah ã chãjat

¹ Bũũ biih bohéatdih yeebdih jwĩ naáwát túut caá. Ñijeéh jwĩ jum láa, Dios ã weñat pínahdih ded pah ñi chãjat pínahdih jwĩ bohénap jĩ. Páant jwĩ bohéatjidih ñit quíib bũũdcáp taga. Páant ñi chãjat chah ñi túi jepahatdih yeebdih búdí jwĩ náah yacna caá.

² Jwĩ Maáh Jesucristo ded pah ã wutajjidihjeh yeebdih jwĩ naóh yapaatdih ñi túi jéihna caá. ³ Nin pah ñi jummat pínahdih Dios ã náah yacna caá: Diosdih jepahcannit ã jummat pah yeebbút ñi jumca bojoó. Ñi áa nihcannitjĩh yeejép ñi chãjca bojoó. ⁴ Dios ã enechah, cáacwãbut ã enechah, ñi túi áa jumũú. Pánih áa jumnit, mijeéh ñi túi jumũú. ⁵ Diosdih jéihcannit ã áa nihcannitjĩh ãpĩ metna caá. Obohjeéhtih, yeéb Diosdih jéihnitboó páant ñi chãjca bojoó. Ñi weha mána yaádhjeéh túinijeh ñi jumũú. ⁶ Mijeéh bóojeéh jumnihdih ñi dúuc wái metca bojoó. Dios nihat ñi chãjatdih jéihnit, páant ñi chãjat jíib búdí ã peéh chãjbipna caá. Jon ñi pebh jubínitji caandih búdí jwĩ bohénap jĩ. ⁷ Dios jwiútdih í náah chãjatdih wutcan, túinijeh jwĩ jummat pínahdih ãt wutap wut jĩ. ⁸ Butéh wã naáwátidih weemjéh wã wutap nihcan beé. Dios yeebdih páant ã wutatdih wã naóh yapanap be. Pánihna, ded caandih yehna nijná, weemdih nihcan, Diosboodih ã yap yohna caá. Caán caá Túini Espiritudih yeebdih wũhni.

⁹⁻¹⁰ Bũũ míic oyatdih yeebdih bainí wã naáwát túut caá. “Ñi míic oyoó”, Dios ã níj wutatdih joinítji caandih túi jepahna caá ñi chãjap. Pánih jepahna,

nihat ñih baác Macedoniadih moón Jesúhwãdih yeéb ñi túi oina caá. Pánih míc oinit, chah míc teo wáacnit ñi jumúú. ¹¹⁻¹² Pánih míc oina, biícdih táinijeh ñi jumúú. Míc jãihcanjeh, bitadih yeejép táoh naóhcan, bita ï tewatdih tabit ñi en naóhca bojoó. Yabhcanjeh, ñi túi teweé. Pánih teonit, bitaáh bií déedih, ñih jeémátidihbut tabit ñi úbh tac bũgáca bojoó. Pánih wútatdih jáantjeh yeebdíh jwĩ naáwáp jĩ. Caandíh ñi jepahachah, Diosdih jéihcannitboó yeebdíh ennit, “Queét túi chãjnit caá”, ï niijbípna caá.

Jesucristo ã jwúub dei jũúwáchah, ded pah ã yapat pínah

¹³⁻¹⁴ Bũũ, jwĩ déewã panihnitá, Jesúhwã ï wũnuchah, ded pah ï yapat pínahdih yeebdíh jwĩ naáwát túut caá, tabit ñi jĩgahcat pínah niijná. Jesucristo ã wũnat túttimah, Dios caandíh át jwúub boonanap tajĩ. Caan páh mantih jwiít áihwã jwĩ wũnat túttimah, jwiítidihbut ã jwúub boonachah, Jesús ã jumupboó ájeéh jwĩ túi jumvipna caá. Páant jwĩ yapat pínahdih ñi túi náhninaá. Pánih náhninit, Jesúhwã, ñi oinit ï wũnat túttimah, ñi bidna yuhna, tabit ñi jĩgahca bojoó. Bita Jesúsdih jepahcannit, Jesúsjeéh ï wihcan niít. Pánihna, ï oinit ï wũnat túttimah, ï jwúub míc encat pínahdih jéihna, búdí jĩgahnit, ï moh yéejna caá. Obohjeéhtih, Jesúsdih jepahcannit ï jĩgahat pah yeéb ñi jĩgahca bojoó.

¹⁵ Nin pah Jesússeh ã naáwátjidih yeebdíh jwĩ naóh yapana caá: **“Queét wíihwã wũnnitji ï boopud jũúwát pínah jãtih, wũncannit ï waóh pũuh laab béj pãican niít”**, Jesús át niijíp wut jĩ. ¹⁶⁻¹⁷ Nin pah ã yapvipna caá: **“Ñi pũuh laáb jũúwá”**, Jesús

ã niij ejatdih, ángelwã ï maáh bádí ã ejatdihbut jwĩ joibípna caá. Dios ã wũhni póojat nahjih ángelwã ï maáh ã póojochah, jwĩ joibípna caá. Páant ã yáanachahjeh, jwĩ Maáh Jesucristo ã jwúub dei jũóhbipna caá. Páant ã dei jũúwáchah, áihwã wunnitji, Jesús ã boo pud jũúwátji pah muntih, ï boo pud jũóhbipna caá. Queét ï boo pud jũúwáchah, jwiit áihwã wuncannit, ïjeéh wáac juibínit, wépép púuh laab béjnit, mah tólihna nihat biíc dih jwĩ Maáh Jesús dih jwĩ jwááhbipna caá. Pánihna, jwiit nihat biíc dih Jesús jeéh páantjeh jwĩ jumbipna caá.*
 18 Pánihat pínah dih jéihnit, yeéb bitadihbut jwúub naóh yapanaá, Jesúihwã wunnit dih tubit ï jĩgahcat pínah niijná.

5

1-2 Bũũ, wã déewã panihnitá, Jesúihwã wunnit ded pah ï yapat pínah dih ñi jéihna caá, bũca. Obohjeéhtih, débólih Jesucristo ã jwúub dei jũóhni yeó jáap pínah dih jwiit cãacwã jwĩ jéihcan caá. “Náhnicaah, nũmni ã juyát pah jwĩ Maáh Jesucristo ã jwúub dei jũóhbipna caá”, yeebjéh ñi niij jéihna caá. Páant ñi jéihyechah, wã jwúub naóhcan niit.*
 3 Dios dih jepahcannit nin pah ï niijbípna caá: “Bũũ túini láa caá. Cãacwã ï míic maocah, úumcanjeh, jwĩ túi jumna caá. Yeejép yapat jwiit dih ã wihcan niit”, ï táoh niijbípna caá. Páant ï niijíchahjeh, caandih ï jepahcatji jíb, Jesús peéh chãjadih ã jwúub dei jũóhbipna caá. Yaádh ï weép jáaat dée pah ã jumbipna caá. Wudũ jumnih mi weép jáanachah, caán tubatdih mi jéih jweicán caá.

* 4:16-17 Mt 24.30-31; Mr 13.26-27; 1Co 15.51-52
 24.43; Lc 12.39; 2P 3.10

* 5:1-2 Mt

Pánihat pah Jesucristo ã jwúub dei júúwúchah, caandíh jepahcannitji ã yéejat jíib ã jéih jweicán niít.* 4-5 Obohjeéhtih, wã déewã panihnítá, yeéboó dupúnap panhipboó jumcan, baabáp panhipboó ñi jumna caá. Jesúsdih jepahcannit, bita ã encat pínah niijná, dupúnapboó yeejép ãpí chájna caá. Obohjeéhtih, yeéboó páant ñi chájcan caá. Pánihna, náhnica nœmní ã waád juyát pah, Jesús ã jwúub dei júúwúchah, ñi wáhi bejcan niít. Yeebdíh peéh chájadih júóhna ã chájcan niít. 6 Jwiít Jesúhwa jumna, caandíh jéihcannit ã chájat pah jwiít dih chájcat caá náahap. Æonit panihnít jumna, ded pah nin baácboó ã yapatdih queét ã jéihcan caá. Obohjeéhtih, jáanit panihnít, “¿Dios ã weñat pínahdih chájat túut niijná, ded pah wã chájbi?” niúj jenah joyát caá jwiít dih náahap. “Waícanjeh Jesucristo ã jwúub dei júóhbi pna caá”, niúj náhninit, túi chájat caá náahap. 7 Jesúsdih jepahcannit, dupúat panhipboó jumna, Æonit panihnít caandíh ã joicán caá. “Jesús ã jwúub dei júóhcan niít”, niúj jenah joinít, ã weñat pínahdihjeh chájnit, ãpí babh máihna caá. 8 Obohjeéhtih, jwiít baabáp panhipboó jannitdih Dios naáwát dih túi jenah joyát caá náahap. Æ weñat pínahdih jenah joinít, yeejép chájcat caá náahap. Soldado míic mawadih bejna, ãtah wao chá páha páahnit, áih bácahdih jáhat pínah niijná, ãtah chóodihbut áih tacamant ápí dœoná caá. Pánihna, soldado ã míic jáhat pah, jwiít Jesúhwa dihbut míic jáhat caá náahap. Obohjeéhtih, jwíih bácahdihjeh pohba jáhatdih niijná wã chájcan caá. Jwíih caolihdih jáhatdih niijná caá wã chájap. Nin caá jwíih

* 5:3 Is 13.8

caolihdih jwĩ jāhat pínah: Jesucristodih túi jenah joinít, Diosdih cãacwãdihbut túi oyat caá caolihdih jāhat ã jumap. “Jesús wã yéejatdih yohnit, weemdih ājeéh ã ub bejbipna caá”, niij jenah joyátbut caolih jāhat ã jumna caá. Pánih jāhnit panihnit jumna, Satanás jwiít dih ã yéejat túutuchah, caandih jwĩ jéih yap yohna caá.* 9-10 Jesucristodih jepahcannit biíc dih Dios jwiítboodih át peéh chājihcap wut jĩ. Obohjeéhtih, āihwã jwĩ jumap pínah niijná, jwĩ yéejat jīb, jwĩ Maáh Jesucristo jwiít dih át wun wūhup wut jĩ. Pánihna, jwiít āihwã jumnit, nin baácboó páantjeh jumna, wanna yuhna, nihat biíc dih ājeéh jwĩ túi jumbipna caá. 11 Caandih náhninit, Jesús dih ñi túi jenah joyát pínah, ñi jepahat pínahdihbut páantjeh ñi míc teo wáacá.

Pablo queédih biéh ã wutat

12-13 Buh yeebdih bainí wã jwáub naáwát túut caá, páant mantih. Nijeéh jumnit Dios naáwát dih yeebdih ĩ bohénachah, ñi túi joyoó. Yeebdih bohéat pínah niijná, Diosboó queédih ã wutuchah, yeebdih bohénit, bádí ĩ teona caá. Pánihna, queédih oinit, ñi túi jepahaá. Yeebát míc oinit, biíc dih ñi túi jumú.

14 Yabhnitdih ñi tewat túutá. Umnitdih, jīgahnitdihbut ñi weñanaá. Wēpcannitdih ñi túi teo wáacá. Bitadh yójahcan, ĩjeéh ñi túi jumú.

15 Yeebdih yeejép chājnitdih ñi yéj chāj jwáubaca bojoó. Nihatdih túi chājnit, biíc dih ñi túi jumú.

16 Ded pah yeejép yapna yuhna, Diosdih túi jenah joinít, páantjeh ñi weñeé.* 17 Caandih ñi wūbh

* 5:8 Is 59.17; Ro 13.12; Ef 6.13-17 * 5:16 Fil 4.4

cádahca bojoó. ¹⁸ Yeó jáap jummat pah “Táina caá, Paá”, Diosdih niijnít ñi jumúú. Túi yapna, yeejép yapna yuhna, biíc yoobó “Táina caá, Paá”, niijnít ñi jumúú. Pánihatdih Dios yeéb Jesúíhwādih ã náah yacna caá.*

¹⁹ Túini Espíritudih túi jepahnit, ded pah ã teo wáacatdih ñi jáhca bojoó. ²⁰ Detdih Túini Espiritu ã naáwáchah, queét ì naóh yapaíhichah, yeéboó joííhcannit pah ñi jumca bojoó. ²¹ Pánihna, nihat naáwátidih túi jenah joinít, ded túini, ded táicanni ã jummatdih ñi jéihyeé. Pánih jéihna, táinidih jepahnit, ñi náhninaá. ²² Obohjeéhtih, táicanniboodíh, ñi joyáh bojoó.

²³ Jwiít yeebdíh Dios ã túyatdih búdí jwĩ náah yacna caá. Pánihna, yeebdíh úúbhna, “Paá, queét mííhwādih búdí ma teo wáacá, yéej chājatdih ì yap yohat pínah niijná. Meemdíh ì túi jenah joyát pínahdihbut teo wáacnit, queétdih ma túi wapaá”, búdí jwĩ niij úúbhna caá. Páant ã teo wáacachah, jwĩ Maáh Jesucristo ã jwúub dei jūóhni yeó jáapdih yeéb áihwā túinit ñi jumbipna caá. ²⁴ Diosjeh yeebdíh ñíonit, ã niijátji pah yeebdíh ã túut nuúm péabipna caá.

Pablo ã péé túyat túutat

²⁵ Wā déewā panihnitá, jwiítidihbut búdí ñi úúbú.

²⁶ Dios ã oyatjñh nihat Jesúíhwā ñi túi míc úúbú.

²⁷ Jwĩ Maáh Jesús ã enechah, nin pah yeebdíh wā naóhna caá: Nin núodih ñi pebhna ì ub juibínachah, nihat caánboó jumnit Jesúíhwādih ñi túi en naáwá.

²⁸ Jwĩ Maáh Jesucristo yeebdíh oinit, ã túi teo wáaca naáh.

* **5:18** Fil 4.6; Col 4.2-7

Páant bóojeh tigaá wã naáwát.
Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files
dated 29 Jan 2022
34c9543b-57a6-5290-ab7b-4fa15529a7e2